

徐孝穆集

徐孝穆集
附錄
PDG

徐庾集序

詩家者流率以靡嫚歸之梁陳
以語於王褒江總輩絺章繪句
膚立者則可耳若徐僕射庾開
府竝誕瓊圃抽穎芝田徐固天
上之麒麟庾亦人間之鸞鸞氣

涵江漢名壓華崧以童子之科
居華貫之任陟鰲坡而視草游
鶴禁以談經的礫若明珠之耀
龍淵鬱葱若翡翠之戲蘭陟娟
倩若美女之舞交竿艷冶若名
花之笑金谷朝所吟詠紙價爲

之夕騰華所流傳雞林爲之泣
慕洵乎耦耕之玉環允矣藍田
之雙璧矣仙李盤根初唐最盛
應制遊覽諸作婉媚綺錯篆玉
雕金筋藏肉中法寓情內莫不
攄藻乎子山擷芳於孝穆故能

琳瑯一代卓冠當時曲江射洪
二君間以雅澹雖丰骨全出而
英翹少遜盛極蘊衰識者憾焉
且古今文人專詣者多兼工者
少有韻之詩與緣情之文勢難
兼舉淵雲之儔未聞壯長城於

五言屈宋之流未聞騁妙辯於
竹素而二公學該玉府之森藏
筆捲銀河而直上不但哀江南
一賦彪炳無前與遵彥之書婉
麗莫偶凡郊廟典章郵筒來往
恍如覲燕許之手筆逢僑肸之

面談後有作者盡歸下風昔人
讀君山書如積猗頓之富今披
徐庾集有不入波斯之航也哉
故合而鉸之爲蕤苑之笙簧制
作之粉黼抑余尤有異焉物不
孤生必有其偶初唐曰沈宋而

昆明之篇沈不敵宋盛唐曰李
杜而岳陽之釋李不如杜二公
之詩文工力格局無不悉配真
宇宙人文一大結聚也以之作
延津之合夫誰不宜

東海屠隆題

徐陵本傳

唐散騎常侍姚思廉撰

徐陵字孝穆東海郟人也祖超之齊鬱林太守梁員外散騎常侍父摛梁戎昭將軍太子左衛卒贈侍中太子詹事諡貞子母臧氏嘗夢五色雲化而爲鳳集左肩上已而誕陵焉時寶誌上人者世稱其有道陵年數歲家人攜以候之寶誌手摩其頂曰天上石麒麟也光宅惠雲法師每嗟陵早成就謂之顏回八歲能屬文十二通莊老義旣長博涉史籍縱橫有口辯梁普通二年晉安王爲西平將軍寧蠻校尉父摛爲

王諮議王又引陵參寧蠻府軍事大通二年王立爲皇太子東宮置學士陵充其選稍遷尚書度支郎出爲上虞令御史中丞劉孝儀與陵先有隙風聞劾陵在縣贓汙因坐免久之起爲南平王府行參軍遷通直散騎侍郎梁簡文在東宮撰長春殿義記使陵爲序又令於少傅府述所製莊子義尋遷鎮西湘東王中記室參軍太清二年兼通直散騎常侍使魏魏人授館宴賓是日甚熱其主客魏收嘲陵曰今日之熱當由徐常侍來陵卽荅曰昔王肅至此爲魏始制禮

儀今我來聘使卿復知寒暑收大慙及侯景寇京師
陵父攜先在圍城之內陵不奉家信便蔬食布衣若
居憂恤會齊受魏禪梁元帝承制於江陵復通使於
齊陵累求復命終拘留不遣陵乃致書於僕射楊遵
彥竟不報書及江陵陷齊送貞陽侯蕭淵明爲梁嗣
乃遣陵隨還太尉王僧辯初拒境不納淵明往復致
書皆陵詞也及淵明之入僧辯得陵大喜接待餽遺
其禮甚優以陵爲尚書吏部郎掌詔誥其年高祖率
兵誅僧辯仍進討韋載時任約徐嗣徽乘虛襲石頭

陵感僧辯舊恩乃往赴約及約等平高祖釋陵不問尋以爲貞威將軍尚書左丞紹泰二年又使于齊還除給事黃門侍郎祕書監高祖受禪加散騎常侍左丞如故天嘉初除太府卿四年遷五兵尚書領大著作六年除散騎常侍御史中丞時安成王顓爲司空以帝弟之尊勢傾朝野直兵鮑叔獻假王威權抑塞辭訟大臣莫敢言者陵聞之乃爲奏彈導從南臺官屬引奏案而入世祖見陵服章嚴肅若不可犯爲歛容正坐陵進讀奏版時安成王殿上侍立仰視世祖

流汗失色陵遣殿中御史引王下殿遂劾免侍中中書監自此朝廷肅然天康元年遷吏部尚書領大著作陵以梁末以來選授多失其所於是提舉綱維綜覈名實時有冒進求官誼競不已者陵乃爲書宣示衆咸服焉時論比之毛玠廢帝卽位高宗入輔謀黜異志者引陵預其議高宗纂曆封建昌縣侯邑五百戶太建元年除尚書右僕射二年遷尚書左僕射陵抗表推周弘正王勵等高宗召陵入內殿曰卿何爲固辭此職而舉人乎陵曰周弘正從陛下西還舊藩

長史王勸太平相府長史張種帝鄉賢戚若選賢與舊臣宐居後固辭累日高宗苦屬之陵乃奉詔及朝議北伐高宗曰朕意已決卿可舉元帥衆議咸以中權將軍淳于量位重共署推之陵獨曰不然吳明徹家在淮左悉彼風俗將畧人才當今亦無過者於是爭論累日不能決都官尚書裴忌曰臣同徐僕射陵應聲曰非但明徹良將裴忌卽良副也是日詔明徹爲大都督令忌監軍事遂克淮南數十州之地高宗因置酒舉杯屬陵曰賞卿知人陵避席對曰定策出

自聖衷非臣之力也其年加侍中餘竝如故七年領
國子祭酒南徐州大中正以公事免侍中僕射尋加
侍中給扶又除領軍將軍八年加翌右將軍太子詹
事置佐史俄遷右光祿大夫餘竝如故十年重爲領
軍將軍尋遷安右將軍丹陽尹十三年爲中書監領
太子詹事給鼓吹一部侍中將軍右光祿中正如故
陵以年老累表求致仕高宗亦優之乃詔將作爲造
大齋令陵就第攝事後主卽位遷左光祿大夫太子
少傅餘如故至元年卒時年七十七詔曰慎終有典

抑乃舊章令德可甄諒宜追遠侍中安右將軍左光祿大夫太子少傅南徐州大中正建昌縣開國侯陵弱齡學尚登朝秀穎業高名輩文曰詞宗朕近歲承華特相引狎雖多日疾方期克壯奄然殞逝震悼于懷可贈鎮右將軍特進其侍中左光祿鼓吹侯如故并出舉哀喪事所須量加資給謚曰章陵器局深遠容止可觀性又清簡無所營樹祿俸與親族共之太建中食建昌邑戶送米至于水次陵親戚有貧匱者皆令取之數日便盡陵家尋致乏絕府僚恠而問

其故陵云我有車牛衣裳可賣餘家有可賣不其周
給如此少而崇信釋教經論多所精解後王在東宮
令陵講大品經義學名僧自遠雲集每講筵商較四
座莫能與抗目有青睛時人以爲聰慧之相也自有
陳創業文檄軍書及禪授詔策皆陵所製而九錫尤
美爲一代文宗亦不以此矜物未嘗詆訶作者其於
後進之徒接引無倦世祖高宗之世國家有人手筆
皆陵草之其文頗變舊體緝裁巧密多有新意每一
文出手好事者已傳寫成誦遂被之華夷家藏其本